

# Victurs e sperdiders

Quei hai era dau tier las elecziuns en Surselva

DA GIUSEP VENZIN / ANR

■ **La Surselva – cun excepziun dil cumin da Trin – tarmetta bunamein mo commembers dalla pcd el cussegl grond a Cuera e Martin Candinas – il schef marketing dalla partida cantunala – po strusch suenter cun surrir.** Sulet *Renatus Casutt* da Falera (senza partida) e *Martin Montalta* (pdb) han gudi-gnau in sez sco buca commembers dalla pcd. Auter el cumin da Trin, leu ha la pld dominau malgrad la nunreelecziun dil president communal da Flem *Thomas Ragetti*. Avon la seduta dil cussegl grond ier suentermiezdi ha l'anr priu la caschun da risdar cun victurs e sperdiders.

## Elecziun tactica

Senza schanzas ei *Othmar Berni* da Val staus en Lumnezia, tier las 212 vuschs dadas ad el en sia vischnaunca ha el survegniu dall'entira Lumnezia romontscha mo aunc 162 vuschs. Ina pintga sorpresa hai era dau per *Daniel Blumenthal* a Val. Igl impresari ha surpriu igl onn vargau l'interpresa da baghegiar Berni da Val ed ha era sponsurau la mesadad dallas plattas duvradas per cuvierer il vial dalla punt inaugurada avon ina jamna. Quei regal ha para buca fatg grond effect, pertgei ils da Val han dau ad el sulet 66 vuschs ed a siu contrahent *Marcus Caduff* 114. *Daniel Blumenthal*: «A Val ei segir vegniu eligiu tactic per lur candidat e consequentamein encunter mei.» Ella Lumnezia romontscha ha *Marcus Caduff* survegniu rondun 90 vuschs dapli che *Daniel Blumenthal*. A Vella paran ils vischins d'esser cuntents cun lur president communal, els han dau ad el 121 vuschs ed a *Marcus Caduff* 72. *Daniel Blumenthal* ei engaschus en favur dalla fusiun da vischnauncas ed exponents dalla politica han temiu che quei savessi



Dumengia suentermiezdi hai dau enqual sorpresa per ils candidats per in sez el cussegl grond.

FOTO M. HARTMANN

custar vuschs ad el. Quei ei lu era stau aschia, mo sco igl eligiu di sez, mo a Vrin. Pucas vuschs hagi el era fatg a Cumbel ed el argumentescha quei cun siu engaschi el rom dil project Da Casa Val Lumnezia. «Risguardond miu engaschi che pretenda ina ni l'autra decisiun che va buc prau a tuts, sun jeu pli che cuntents cun mia elecziun», ha *Daniel Blumenthal* detg ier avon la seduta dil cussegl grond.

## Senza ils liberaldemocrats a Glion

Ferton ch'ils liberaldemocrats ein ils victurs dallas elecziuns sin camp cantunala, han els nudau el cumin da Glion ina terrada. *Max Buchli* da Versomi – igl emprem president dil parlament dalla Re-

giun Surselva – ha buca pudiu defender il sez da sia partida suenter la demissiun da *Flurin Caviezel* da Pitasch e quel sez ha fatg il secund ellas elecziuns da mistral encunter il giuven politicher *Roman Cantieni* dalla pcd. *Flurin Caviezel*: «Jeu sai buca declarar diltut la terrada en quella fuorma. En scadin cass havevel jeu quintau che *Max Buchli* vegni eligius.» Tochen dacheu sustenevien las partidas pintgas el cumin dalla Foppa – ils liberaldemocrats e la Partida populara – in l'auter. Uonn seigi quei buca stau il cass, mintgina hagi fatg dapersei il cumbar electoral.

Era il resultat da *Martin Montalta* ei buca grondius. El ha retschert 203 vuschs pli pauc che *Margrit Darms* (938

vuschs) ed era pli paucas ch'igl independent *Renatus Casutt* da Falera (758), malgrad che quel ha giu ferma concurrenza en atgna vischnaunca. La presidenta communal *Silvia Casutt* ei vegnida eligida da niev e honorificamein. La commembra da suprazionza dalla Regiun Surselva ha survegniu 865 vuschs. *Martin Montalta* ha era survegniu da votantas e votants dil marcau da Glion ina pulita ella steina. *Margrit Darms* (326 vuschs), *Silvia Casutt* (274) e *Vitus Dermont* (259) han retschert dapli vuschs ch'il president dil marcau en sia atgna vischnaunca. Sco *Flurin Caviezel* ei era il president dil marcau dil meini che giugs tactics hagian sminuiu siu diember da vuschs. «La davosa gada havevel jeu las

biars vuschs. Ils votants dalla ped havevan dau quellas vuschs per tener ora *Renatus Casutt*. Quel sez ei buca staus surstaus da siu resultat ellas elecziuns novas: «Jeu hai prestau dabia per la regiun ed ei fa plascher sch'ils votants han buc emblidau quei.» A Falera hagi el survegniu dapli vuschs che sia concurrenta e presidenta communal.

## La pli gronda vischnaunca senza deputau

Culla terrada dil president communal *Thomas Ragetti* piarda Flem siu deputau. El sappi e stoppi viver cun quella terrada – el hagi consequentamein empau dameins lavur. Era per la partida hagi quei neginas consequenzas negativas, ella vegni aschia regiuvinata. Dapli breigias ha il president communal da Flem d'acceptar la tenuta dils votants da sia vischnaunca. La pli gronda vischnaunca el cumin da Trin hagi negin deputau e vischnauncas pintgas dus. Motivs per sia terrada ha *Thomas Ragetti* buca vuliu tscherer. La vischnaunca da Flem ha buca vuliu comunicar ils resultats dallas elecziuns en vischnaunca.

Neginas surprasas hai dau ella Cadi. Ils candidats dalla ped ein sco adina eligi ed ils auters han tratg la cuorta. *Timo Stammwitz* ha ussa la cuida da rimnar ses placats ch'ei dat daplirs che quei ch'el ha survegniu vuschs.

Ina dallas surprasas grondas la dumengia ei stada la retirada da *Marcus Hasler* da dumengia al cumin da Rueun. Sco motiv ha el fatg valer la midada da piazza e da cantun. Ei vegn supponiu ch'il president dalla Partida burghes-democratica dil Grischun daventi niev schef dallas Penticularas Zermatt. Il deputau ha buca negau e buca confirmau quei: «Damaun datti in communicau», ha el detg ier a Cuera.

## REGIUN SURSELVA

### Respectar il principi dalla subsidiaridad

Il parlament dalla Regiun Surselva renconuscha ch'il cantun Grischun ei surstructurau cun 11 districts, 13 corporaziuns regiunalas, 39 cumins, 180 vischnauncas e varga 400 purtaders dalla collaboraziun intercomunala. Il parlament beneventa da principi las stentas dalla regenza da reformar las structures dil cantun. Il parlament ei denton era claramain dil meini ch'ei seigi da risguardar en quei connex il principi dalla subsidiaridad e fa per quei motiv las suandontas pretendenzas:

1. La refuorma dallas structures observa il principi dalla subsidiaridad. Pensums che san vegnir realisai sin in scalem interieur du-ein buca vegnir delegai ad instanzas superiuras.  
2. Enteifer il cantun duei ei aunc dar treis scalems statals: Las vischnauncas, las corporaziuns regiunalas/districts ed il cantun.

3. Corporaziuns regiunalas e districts du-ein esser geograficamein identics. Sin quei scalem duein activitads legislativas, executivas e giudicativas vegnir ordinadas.

4. Ina subordinaziun dils fatgs tutelars, da stumadira e concuors sut las dertgiras vegn refusada. Quellas incumbensas, ils fatgs da stadi civil e dils survetschs socials (aschilunsch ch'els restan buca tiel cantun) ein d'adossar da principi allas corporaziuns regiunalas.

5. Fusiuns da vischnauncas astgan buca succeder da surengiu. Mintga vischnaunca sto haver il dretg da saver decider a moda suverana.

6. Ina centralisaziun da piazzas da lavur atgna mo succeder per motivs urgents. Cuntrari da quei vegn il cantun animaus da decentralisar ellas regiuns piazzas da lavur nua ch'igl ei pusseivel e raschuneivel.

## PRO SENECTUTE

### Aua, igl element pil beinesser

(cp) **Gimnastica ell'aua schenghegia nova energia e beinesser. Sper aunc auters sports ei quei ina fetg buna prevenziun encunter malsognas dalla motorica dil tgierp ed era sco terapia suenter interenziuns ortopedicas.** Aqua-fitness ei senudar e gimnastica ell'aua. Aqua-jogging ein tuts ils moviments ell'aua. La gimnastica vegn fatga en pintga altezia dall'aua (135 m)

Naven dils 24 da zercladur 2010 ha liug a Trun puspei Aqua-fitness dalla Pro Senectute Grischun. Las lecziuns ein adattadas ton per persunas che san senudar sco per persunas che san buca senudar. Cun exercizis vegn la musculatura

rinforzada e la circulaziun stimulada. En atmosfera luca vegn trenau la moviblad e la coordinaziun.

*Saskia Kadner*, scolasta da senudar e da sanadad, menadra da sport Aqua-fitness per seniors selegra da mussar en ina moda creativa tgei pusseivladads ch'ei dat da semover ell'aua. Ella beneventa cun plascher ton senioras sco era seniors.

Las lecziuns d'Aqua-fitness han liug mintgamai la gievgia dallas 09.00–09.45 el bogh cuvretg dalla Casa Depuoz a Trun.

Sciariment detagliu dat *Saskia Kadner*, 7154 Ruschein, tel. 081 925 11 34. L'annunzia sa ins far directamein tier la menadra (mardis avonmiezdi).

## MUSTÉR

### Engaschi en favur dalla cultura

(anr) **La suprazionza dil Forum cultural internaziunal Mustér ei seradunada a sia emprema seduta suenter la radunanza generala che ha purtau entginas midadas personalas.** Sut l'egida dalla nova presidenta *Jacinta Jacomet-Lombriser* da Mustér ei igl anteriur collaboratur dalla Lia Rumantscha, *Andrea L. Rassel* da Kreuzlingen, vegnius tscharnius sco vicepresidente dil forum.

Alla suprazionza appartegnan plina-

von *Hans Huonder* da Mustér, *Fidel Pally* da Curaglia, *Martin Candinas* da Rabius e *Wendelin Jacomet* da Mompé Medel. Il secretariat vegn menaus vinavon d'*Annamaria de Castelberg* da Mustér.

La suprazionza ha fixau las finamiras futuras dil forum. Suenter haver arranschau e conorganisau cun grond success plirs seminaris davart las minoritads linguisticas dall'Europa e l'Europeada 2008 vulan ils responsa-

bels cuntinuar cun la lavur en favur dalla cultura e dil sport. Medemamein eis ei previu da realisar ina nova pagina d'internet. Ils 28 da december 2010 vegn il Forum cultural internaziunal Mustér ad organisar comunablamain cun la vischnaunca da Mustér in concert en baselgia parochiala S. Gions a Mustér.

Il «National Symphony Orchestra of Georgia» che dat il concert vegn dirigiu dil convischin *Simon Camartin*.

### Kino solar puspei a Sagogn

(cp) **Sco gia igl onn vargau organisescha l'uniun Pro Sagogn puspei in kino sut tschiel aviert cun agid dad energia solara.** Il 12avel Kino Open Air ha liug sonda, ils 19 da zercladur 2010. La projecziun dil film ei pusseivla cun nuot auter che la glisch dil sulegl. Per la secunda gada vegn la squadra da «Cinéma Solaire» a Sagogn. L'elecziun dil film ei puspei buca stada semplia. Il comite d'organisaziun ei decidius per in film da famiglia. Al Kino Open Air Sagogn sa ins guder la cumedia «Cool Runnings». Ei settracta d'ina producziun da Walt Disney da 1993 cun bia acziun, musica da reggae e sequenzas cun bia tensiun. Raquintada vegn la historia dall'equipa da bob dil Jamaica che havess bunamein gudi-gnau l'emprema medaglia als giugs olimpics d'unviern da Calgary. Il kino purtabel funcziuna cun energia regenerabla. L'infrastructura ei schi leva ch'ella ha plaz sin dus carrets da velo.



Per la secunda gada vegn la squadra da «Cinéma Solaire» a Sagogn.

MAD

Il 12avel Kino Open Air Sagogn entscheiva sonda, ils 19 da zercladur 2010 allas 19.30 sin plaz scola a Sagogn.

Suenter il beinvegni e l'introducziun el kino solar vegn il film mussaus naven dallas 21.30. L'entrada ei libra.